

Чипалиннэсал декларасијачи нари доролбони

Дапарра долдапула ресолјусијази 217 А (III) Гениралинэиңи Ассамбилејаңи Сагзи бѐ 10 (зон) инэңидуни 1948 (гѐда миңга хују таңгу зүндѐ запку) ананиду

[?]

Мөрөнзи боддоумари нари наррѐ эсини болзиттā чипалиннэсалду нари нумидуни омоттоммѐ эввури тананддā дорочи тари бѐни гѐву тэккѐни, тэдэ тэккѐни, эми вāллѐ биввури тэккѐни;

мөрөнзи боддоумари тари нари доррѐни болзиттаури балзѐрини вāлиххā тари госсѐллини нари иркāни, андупури тамачѐ биввуррѐ, хамачѐду гурусэл кэсѐлу оличи, биличи эмѐри нѐллѐ, эмѐри сѐнэззѐ чава долдапула нари гугдама мөрѐниңэчи;

мөрөнзи боддоумари нари доррѐни эттѐуми товвури гѐ кусузини каирамбуззи, нари зобоми пāулими эбуддѐни вāлимаччѐ болзизѐсалтаи;

мөрөнзи боддоумари тари бэлэчими оввури гурусал андаилңачи бибуддѐчи;

мөрөнзи боддоумари тари Обединѐннѐја Нāсија гурулни нурихачи Устāвиду мѐнэ актāривари нари дāји доромбони, нари маңгāни сāмари чѐми тоичи бэлэчибуддѐри сѐсиāлинэи прогрѐсситѐи биккѐчи улиңгаулиңга опѐми дāји гѐвузи бимѐри;

мөрөнзи боддоумари тари гои бѐсал члѐнучи токтоумачихачи бэлэчибуддѐри Органисāсијандѐ Обединѐннѐи Нāсијандѐ гѐсэ уилѐмѐри нари доррѐни гѐбубуддѐри, нари доррѐннѐ, нари дāјима гѐввѐннѐ итѐчимѐри оррѐ;

мөрөнзи боддоумари тари чипалиннэсал сāривачи доро мөрѐмбѐннѐ, гѐву мөрѐмбѐннѐ тари актāввуррѐ зиң улиңга хозидалā андуми.

Генерāлина Ассамблѐја

долданзини эсипчи Чипалиннэсал Декларасијачи нари доролбони садāчаңуззи дапагаччи чава андуми муттѐитѐми чипалиннѐ гурусэл, бѐсол чѐми гѐдаддā нари, гѐдаддā хѐпа ѐргануни гѐгдѐкѐ актамари эсипчи Декларассијā, каксилѐл аллаупури дāруни, таттуччури дāруни тари доролб , тари гѐвулбѐ гѐбубуддѐчи бэлэччилѐл. Чѐпѐ насѐналинѐјјѐ местународнѐјјѐ прогрессивнѐјјѐ меропријатѐјјѐ гѐручи андуитами пѐргѐлол чипāлиннѐпа улиңгази сāввѐмбѐнда, хозидалā андупѐнда ча садāчалба бѐ гуруни дѐдуннѐ, хѐпа членуни дѐдуннѐ, нā гуруни дѐдуннѐ хамачѐ јурисдѐксијѐду нѐни бѐни.

Статија 1

Чипāли гуруннѐ балзичи гѐвумѐ, омотто мѐнэ мөрөнзи, мѐнэ доронзи. Нѐчи идѐлу, иркалу, мѐнэ мѐнзи нāдактаңачи бѐчи.

Статија 2

Хамачѐддā чипāли нари нāдассичи чипāли доролбо, чипāли гѐвулбѐ эсипчи декларасијадѐ долдапулалба хаиваддā хѐниддā эпѐлѐ кадаччѐ: гои халаддā бизини, хѐрѐктѐни силланиддā гои бизини, хусѐннѐддѐ-ѐктѐннѐддѐбизини, кэсѐниддѐ гои бизини, религијаниддā гои бизини, политическиддѐ гоиддѐ тѐдѐни, гурумаддā сѐсиалинѐиддѐ тэккѐни бизини, абдулусалддā, бајанзисалддā сѐнэззисѐлддѐ бизини.

Тамаччу эввури тѐ хамачѐддā чипали кадаккѐ политическѐиддѐ доромѐмоддѐ гуру-гурумама тэккѐллѐ бѐ статуссѐни, нā статуссѐни, хамачѐду нари бѐни, бизини тари нā сисā бѐ, нуидѐ киханзи бѐ, мѐнэ эси заңгѐррā бѐ камаличипула суверинитетулуддѐ бѐ.

Статија 3

Хамачѐддā чипāли нари нāдассичи чипāли дорони бѐни биввуритѐи, гѐвутѐи, мѐнэ-мѐнзи сисā биввуритѐи.

Статија 4

Нуиддѐ элини бѐ болзитаду, болзиттаури доронду; болзитаддā, болумба худасуррѐддā хѐрѐссури хамачѐддā хѐниддā бизини.

Статија 5

Нуиддѐ нуивѐддѐ эзили пāччѐ, зиң катузи, наризи хаңасаи эзили булмѐччѐ нѐни мөрѐмбѐни сѐңгѐрѐммѐ кэсулѐммѐ.

Статија 6

Хамачѐддā чипāли нари, хаидуддā бими дорони бѐни нѐни правосубекносѐни сāбуддѐчи.

Статија 7

Чипāли гурусал гēду омотто доролчи бини нуиддē бизини омотто гē аксаччуритаини. Чипāли гурусал дорочи б̄ини омотто аксаччуритаи хамачēдда чипāли болзитаду, болзиттā имōччуриду эсипчи декларāсијjā камаличчитай.

Статија 8

Хамачēддā чипāли нари дорони б̄ини нōни дāји доролбони конститусијjā. Гēккэ бухэмбэни камаличихандучи компетēнтнэй гурума судусэлбэ улиңгамаңузи андуттōмбуми.

Статија 9

Нуивэддэ эзилил бай аристовайра, эзилил даппā, эзилил хасаси.

Статија 10

Хамачēддā чипāли нари нōни доррōнни нōни уилэккōнни сāбуддōчи, нōни уголовнэй баитани тэддēни нōттоини уччимбэчи сāбуддōчи, дорони б̄ини омотто биввури тэккэндуннi нōни баиттāни кэсэзи ёробуддōчи мēнэ сисā б̄и беспристраснэй с̄удуду нэ зēрударрā тэддэ гэлэми.

Статија 11

Хамачēддā чипāли нари, нуивэ баиталлēчи, дорони б̄ини мēпи баитала анā опōми суду баиттāни бāввōталлāни гēмззи кэсэзз̄и баиттани ёроми, тēлиддэ нōтоини буми хаиваддā чипали аксаччуриду.

Нуивэддэ эзилил с̄үз̄үрэ тари баиттā бāрини эрунду тари баита гурума гēдд̄у гуру-гурума дородд̄у баиталлаури эччини бē. Худэулизи эввури кэсуллэ ча баитā, хамачēмба б̄урилэхэчи ча эрунду, хāли баита бāпула биччи.

Статија 12

Нуиддē эллини мэттэкки бай ūввōнда мэниңн̄и нумибб̄и б̄иккутэини, бай сул̄удами ūпэчими нōни дукутаинн̄и, кореспонуденсијэни сипкутаинни, иркатаинн̄и, репутасијатаинни. Нуиддē чипали дорони б̄ини гē аксачиккутаини мэттэкки сул̄удамари ипэччēгичи.

Статија 13

Хамачēддā чипāли нари дорони б̄ини бōва боки гипали пулими биккуззи силмами.

Хамачēддā чипāли нари дорони б̄ини хамачēмбаддā мēниңн̄иддэ бōво вэдэми нэнуми чōччи гочи исумидда мēнэ бōтакки.

Статија 14

Хамачēддā чипāли нари дорони б̄ини нōмбони хасасидучиб̄иккō гэлэбуззи гои бōду, чаду сиригаччи бими.

Тари доро хэччēни политикама баитоллō хасасидучи, гои баитаду сēлилдд̄у принциплду Организāсијаңи Обидироннэй Насјаңи мэккуссидуннi эсини хэттэ.

Статија 15

Хамачēддā чипāли нари дорōни б̄ини грасидануствā дапами.

Нуивэддэ бай эввури аттō грасидануствōни, нуиддэ мēнэддэ эсини каллā грасиданустваби.

Статија 16

Хусэннē эктэннē, хуруми хозихасал, дорочи б̄ини рāссачи дāррунни, насионалинусичи дāрунни, рел̄иҗиҗачи дарунни эввуми кадаччē м̄үрэнзидучи, нумиззи андусидучи. Нōчи омоттомо дорочи б̄ини м̄үрэнзидучи, м̄үрэм б̄идучи, м̄үрэнду пујједучи.

Д̄үтңосо гэсэ гэвумзи токтоумачими хоз̄үтаччē м̄үронзивэчи сакл̄үчаиричи.

Нуми тари хупа дāјини хупа чоми дорони б̄ини чоми хупадд̄у государствудд̄у аксачикк актами.

Статија 17

Хамачēддā чипāли нари дорони б̄ини умукэддэ гоинēсалду гэсэддэ абдузи таккурами.

Нуидуддэ абдумбани бай нуиддэ эллини тананда.

Статија 18

Хамачēддā чипāли нари дорони б̄ини мөррē, ирккэ, релиҗиҗэ гэввōни; тари доро дапуччēни

релүгијаббү долдаккуббү каллауррē, мәнэ релүгијабби, долдаккуббү умүкэддē пөннēсалдуддē гэсэ долдамбуззи нари дōдуннү умүкэддо тачими, эндуррēддē долзими религиосинэјјү ритуалинэјјү обрјаддōни андуми.

Статија 19

Хамачēддā чипāли нари дорони бүни долдакку гэввōни гэвумзи чава долдамбуззи; мәнэ долдаккуби гэввоннү эми камаличчē дапутабуззи, гэввō гэлэктэмми, алдō идејјā хōнидда томи государуственнаи гранисса эми киханда гаммү бучиммү – тари доро даппуччēни.

Статија 20

Хамачēддā чипāли нари дорони бүни бэрэми чауха гэввōннү хўпа гэввōннү.

Ѓуивэддē нē эввури ўввōндэ хамачēтаидда хўпатаи.

Статија 21

Хамачēддā чипāли нари дорони бүни мәнэ бōнуззи мәнэддэ силмапула нарисалзидда зангēрами.

Хамачēддā чипāли нари дорони бүни мәнэ бōззи омотто ўввури дорони бōби уилэккутэини.

Гуру вōлјани правителство кусуни бўллини; тари вōлја мēпи сāvвōллини зиллэлул анā силмал-силмалду, хамачесалба андуличи гэрэммē омоттоммō силмаури дороду сипкучими силмамми гоилзи омоттомол пормалзи бэлэчимми силма гэввōни андуми.

Статија 22

Хамачēддā чипāли нари, хупаннē, дорони бүни гэлэми сосиалинэи бэлэччуррēддē, андупуррēддē нāдамба мәнэ дороббү дапутабуззи, мәнэ маңгабби гэвумэ балзибуддōни экономическиду, сосиалинэиду кулитурнэиду областиду гурума кусуззи гуру-гурума гэсэ уилэззи бэлэчимэри бō-бō структурēннү, ресурсēнни хэттēини.

Статија 23

Хамачēддā чипāли нари дорони бүни уилэккуду, гэвумэ уилэккō силмабуззү, эмэри камаличчē улиңгази уилэури уилэккуду уилэбуззү, уилэкку анāдуни аксачибуддōчи.

Хамачēддā чипāли нари, мēпи эми сэнгэррēундэ, дорони бүни омоттомо уилэпулэ уилэду омоттомо таммā тамабуддōчи.

Хамачēддā чипāли уиллē нари дорони бүни эввуми камаличчē улиңгамакō таммā тамабуддōчи, ои бигини хамачēддā гои сосиалинэи бэлэччуррē бубуддōчи мēппү мәнэ нумиббү улиңгази кихамбуддōни.

Хамачēддā чипāли нари дорони бүни пропēси хўпамбани андуми, пропеси хўпатаини ўррē мәнэ дороби аксачибуззи.

Статија 24

Хамачēддā чипāли нари дорони бүни дэрукпуритэјјү, хуппуритэјјү, уидōкизи дуралипула уилэури инэңитэјјү, анани-анани таммаури отпускатајјү.

Статија 25

Хамачēддā чипāли нари дорони бүни эргими биввуррē; тари дэппи, багдухи, дуку, окчичими ёропури, нāдассури сосиалинэи бэлэччури-тари чипāли нāда мәнэ эргэббү, мәнэ нумиби эргэмбәннү окчичибуззи, эргими бибуззи, мēппү, мәнэ нумиббү бэлэчибуззи уилэлу анā опē, сагдаппē, хаимиддā эргимбэ вēдэлē мәнэ баитала анāзи.

Эни оччисал јатауна бўсэл дорочи бүни дајизи кихами бэлэчибуддōчи. Чипāl пурил мўрэм балзихалддā, мўрэм эччил балзēддā чипāлиннēтаи омоттомо сосиалинэи бэлэччуррē таммēчи.

Статија 26

Хамачēддā чипāли нари таччўриду дорони бүни. Тэнē тачикку тамала анā, нē тачими хоззўттаури. Чипāl тачикку тамала ана, нэ тачими хоззўттаури. Техническајјү, пропессионалинэјјү, гугдамајјү таччури чипāлиннēпа ўввонзини, ѓуи уидōки бүни.

Таччури нари мөррēннē, нари дөррēннү, нари иддēннү маңга опōнзини, гэббōннү нари доротоини, нари даји гэвутэини даји опонзини. Таччури мәнэ мēпэри сāмаччуррē, маңиттауррē бэлэччини, зēлачимари биввуррē гуру-гуру таундуни, рāсаммā религиōсинаммā хўпа-хўпа таундуни бэлэччини Органисасија Обединонэи Нāсија уилэккōни эмэри валлē биввуррē дапуччēвани бэлэччини.

Амијјā – энијјē дорочи бүни дуллўзи силмами тачиккō, хоттои пурилбэри ўвуличи тачибуддōчи.

Статија 27

Хамачёддā чипāли нари дорони бїни гэвум каксибуззи кулитурнэитэи хўпа биввуритэини, сэбдэними пакчизи андупулази, каксими наука прогресситэини, улиңгамазини таккурами.

Хамачёддā чипāли нари дорони бїни нōни мөрөммө абдуммā интерёссёни аксачибуддōчи, тари андупула (топула) бїгини нōни научинэи литературинэи художественнэи уилэни тари авторини нōни бигини.

Статија 28

Хамачёддā чипāли нари дорони бїни сосиāлинэиддў, гуру-гуру тауни эписизидду, јэ Декларасијаду нурипула доролбо гэвулбэ чипāли андусилил.

Статија 29

Хамачёддā чипāли нари дорони бїни хўпаду, хамачёду чадўмали гэвумззў дајиззў нōни маңгани балзини.

Таккураини мэнэ доролззў, мэнэ гэвулзи хамачёмбаддā чипāли наррё камаличчичи сакōну кусудуни зэңкўр сāбуддōннў гэбубуддōнни гоиннё доролбоччў гэбулбэччў, тэдэмэ мөррө, хупама эбсиззў, чипāлиннёсал эргиккōччи гэллэлбэни каксими тобуддōни.

Эрил доролззў гэвулззў таккурами хōнидда эввури камаличчё сёлилбэ принципилбэ Органисасијани Обединōнэхи Насијаңи.

Статија 30

Хаиддā эсипчи Декларасијаду хаңасаилакка эсини мөрөчөндэ тамачикка хаива буввурё государстватаи, нари хўпатаини, гёда-гёда наритаи доррō хамачёддā уилэккō товвуррё, андуми товвуррё хамачё атуччини доролбо, гавулбэ, декларасијаду нурипулалба.